
**MEMORANDUM O RAZUMIJEVANJU
IZMEĐU DIREKTORATA CIVILNOG
ZRAKOPLOVSTVA REPUBLIKE SRBIJE, DIREKCIJE
ZA CIVILNO ZRAKOPLOVSTVO BOSNE I
HERCEGOVINE, AGENCIJE ZA CIVILNO
ZRAKOPLOVSTVO CRNE GORE, AGENCIJE ZA
CIVILNO ZRAKOPLOVSTVO REPUBLIKE SJEVERNE
MAKEDONIJE I GENERALNOG DIREKTORATA
CIVILNOG ZRAKOPLOVSTVA REPUBLIKE TURSKE
O MEĐUSOBNOJ SARADNJI**

Direktorat civilnog zrakoplovstva Republike Srbije, Direkcija za civilno zrakoplovstvo Bosne i Hercegovine, Agencija za civilno zrakoplovstvo Crne Gore, Agencija za civilno zrakoplovstvo Republike Sjeverne Makedonije i Generalni direktorat civilnog zrakoplovstva Republike Turske (u daljem tekstu: Strane);

Imajući u vidu da su Republika Srbija, Bosna i Hercegovina, Crna Gora, Republika Sjeverna Makedonija i Republika Turska potpisnice Konvencije o međunarodnom civilnom zrakoplovstvu, otvorene za potpisivanje u Čikagu, 7. decembra 1944. godine (Čikaška konvencija);

Imajući u vidu da su Strane, sa ciljem postizanja visokog stepena jednoobraznosti i usaglašenosti u oblastima zrakoplovne sigurnosti i zaštite životne sredine, potpisale Radne aranžmane sa Agencijom Evropske unije za sigurnost zračne plovidbe - EASA (u daljem tekstu: Radni aranžmani);

Imajući u vidu zajednički interes Strana da, u okvirima svojih nadležnosti i u skladu sa nacionalnim zakonodavstvima država Strana, ostvare i/ili unaprijede saradnju u konkretnim oblastima civilnog zrakoplovstva navedenim dalje u tekstu;

Dogovorile su se o sljedećem:

I. Cilj Memoranduma

Cilj Memoranduma o razumijevanju (u daljem tekstu: Memorandum) je uspostavljanje osnova za ostvarivanje i jačanje saradnje Strana u vezi sa pitanjima koja su predmet ovog memoranduma, kao i za koordinaciju nastupa u međunarodnim zrakoplovnim organizacijama.

II. Oblasti saradnje

Strane su saglasne da saradnju uspostave i/ili dodatno unaprijede u vezi sa sljedećim pitanjima:

1. Podržavanje inicijative za osnivanje Centra za obuku u oblasti osiguravanja sa sjedištem u Beogradu

Imajući u vidu značaj stalnog unapređenja nivoa osiguravanja u zrakoplovstvu sa ciljem efikasnije primjene standarda i preporučene prakse Međunarodne organizacije za civilno zrakoplovstvo (ICAO SARPs), Strane podržavaju inicijativu za osnivanje centra za obuku u oblasti osiguravanja u zrakoplovstvu, čime bi se značajno doprinijelo realizaciji navedenih zahtjeva, a obuka u ovoj oblasti bila dostupnija i finansijski isplativija. U tom smislu, Strane su spremne da, u okvirima svojih nadležnosti i mogućnosti, preduzmu dalje korake u pravcu ispunjenja uvjeta za osnivanje i razvoj centra kao posebnog pravnog lica.

Konkretni aktivnosti Strana u vezi sa realizacijom ovog cilja biće definirane posebnim aranžmanom.

2. Priznavanje pilotskih dozvola

Imajući u vidu da su Strane, sa ciljem postizanja visokog stepena jednoobraznosti i usaglašenosti u oblastima zrakoplovne sigurnosti, potpisale Radne aranžmane koji se, između ostalog, odnose i na priznavanje pilotskih dozvola, Strane su saglasne da zajednički djeluju prema Evropskoj komisiji EASA sa ciljem automatskog priznavanja pomenutih dozvola.

3. Provođenje zajedničkih inspekcija i obuka, uključujući obuke na radnom mjestu (OJT)

Strane su saglasne da se dodatno razmotre mogućnosti za planiranje i provođenje zajedničkih inspekcija i precizno definišu elementi neophodni za realizaciju istih, u skladu sa nacionalnim zakonodavstvima država Strana.

Strane su, takođe, saglasne da na prijedlog bilo koje od Strana, svaka Strana može omogućiti obuke na radnom mjestu (OJT) zainteresiranom osoblju jedne ili više Strana. Modaliteti realizacije obuke definišu se neposredno za svaku obuku. Troškove snosi Strana ili Strane koje su imale potrebu za obukom.

Strane razmjenjuju sve informacije potrebne za realizaciju obuka.

4. Pul stručnjaka

Ovim memorandumom se osniva Pul stručnjaka koji razmatra pitanja od zajedničkog interesa za sve Strane, sačinjava prijedloge za dalje postupanje u vezi sa istim, kao i u vezi sa koordiniranim istupanjem Strana pred međunarodnim zrakoplovnim organizacijama i relevantnim tijelima Evropske unije, nadležnim za praćenje primjene sporazuma koje su Strane zaključile ili namjeravaju da zaključe sa Evropskom unijom. Pul stručnjaka sačinjavaju relevantni eksperti koje, za svaku oblast od zajedničkog interesa, nominuje svaka Strana.

5. Provođenje zajedničkih vježbi traganja i spašavanja u civilnom zrakoplovstvu

Imajući u vidu da pojedine Strane aktivno učestvuju u radu Regionalnog savjetodavnog komiteta za traganje i spašavanje u civilnom zrakoplovstvu, sve aktivnosti traganja i spašavanja u civilnom zrakoplovstvu, uključujući i zajedničke vježbe, biće organizirane u okviru djelovanja navedenog komiteta.

Poziv za učešće u radu Regionalnog savjetodavnog komiteta za traganje i spašavanje u civilnom zrakoplovstvu otvoren je i za ostale zainteresirane.

6. Reguliranje oblasti bespilotnih zrakoplova

Strane su svjesne da oblast bespilotnih zrakoplova dobija sve više na značaju, dok istovremeno reguliranje ove oblasti i dalje ostaje otvoreno pitanje. Zbog toga, Strane izražavaju spremnost da aktivno razmjenjuju iskustva stečena izradom i primjenom novih propisa kojima se regulira ova oblast.

7. Strane su saglasne da po potrebi organiziraju forumе civilnog zrakoplovstva, na kojima bi, u saradnji sa zrakoplovnom industrijom i ostalim zainteresiranim stranama bila razmotrena pitanja od zajedničkog interesa za neometani razvoj civilnog zrakoplovstva. Strane bi naizmjenično organizirale pomenute forumе civilnog zrakoplovstva.

III. Prijelazne i završne odredbe

Ovaj memorandum stupa na snagu danom potpisivanja istog od strane ovlaštenih predstavnika Strana.

Ovaj memorandum može biti izmijenjen pisanim putem uz saglasnost svih Strana.

Svaka Strana ima pravo da se povuče iz ovog memoranduma dostavljanjem pisanog obavještenja ostalim Stranama.

Sačinjeno u Beogradu, dana 16. januara 2023. godine, u šest originalna primjerka na engleskom jeziku.

Za Direktorат civilnog zrakoplovstva Republike Srbije

Za Direkciju za civilno zrakoplovstvo Bosne i Hercegovine

Za Agenciju za civilno zrakoplovstvo Crne Gore

Za Agenciju za civilno zrakoplovstvo Republike Sjeverne Makedonije

Za Generalni direktorat civilnog zrakoplovstva Republike Turske

Prilog

Dana 29. decembra 2023. godine, Predsjedništvo Bosne i Hercegovine donijelo je Odluku broj 01-50-1-3762-20/23 kojom se daje ovlaštenje direktoru Direkcije za civilno zrakoplovstvo Bosne i Hercegovine da potpiše Memorandum o razumijevanju između Direktorata civilnog zrakoplovstva Republike Srbije, Direkcije za civilno zrakoplovstvo Bosne i Hercegovine, Agencije za civilno zrakoplovstvo Crne Gore, Agencije za civilno zrakoplovstvo Republike Sjeverne Makedonije i Opće uprave za civilno zrakoplovstvo Republike Turske o zajedničkoj saradnji u oblasti zrakoplovstva.

Dana 9. februara 2024. godine, g. Zorislav Ivanović je imenovan vršiteljem dužnosti direktora Direkcije za civilno zrakoplovstvo Bosne i Hercegovine te kao takav valjano ovlašten, potpisuje Memorandum o razumijevanju.

Ovaj prilog sačinjen je u Beogradu 28. marta 2024. godine u šest primjeraka. Svaki primjerak priložen je jednom od originala Memoranduma i predstavlja njegov sastavni dio.

Za Direkciju za civilno zrakoplovstvo Bosne i Hercegovine

Vršitelj dužnosti direktora
Zorislav Ivanović, s. r.